

Regional News Unit AIR Aizawl  
Friday, June 14, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Mizoram Sports Conclave chu vawiin khan Aizawlah Chief Minister Pu Lalduhoman a hawng.
- Sorkar laipui Ministry of Agriculture & Farmers Welfare atangin Mizoram Horticulture Department hmalakna hrang hrang te hmuhpui turin Central Team Member ten Mizoram an rawn tlawh.
- June ni 26 ah Lok Sabha Speaker thlan a ni dawn.
- Vawiin atangin Italy-ah G7 Summit tan a ni dawn.



### SPORTS CONCLAVE

Mizo infiammi ten Olympic an hmachhawn ve theihna tura inbuatsaihna hmasa – Mizoram Sports Conclave nimina tan chu vawiinah Aizawl Falkland Venga Baptist Center-ah neih chhonzawm a ni ang.

Nimin khan Chief Minister Pu Lalduhoman Mizoram Sports Conclave hi a hawng a, thusawiin Chief Minister chuan Vision 2036 Olympic chu sorkar policy ni turin ruahmanna kalpui mek a ni a ti a, Sports Conclave chu Mizoram leh India-in infiamna lama a duhthusam a thlen dik theih nana rahbi pawimawh hmasa, zinkawng bul intanna a ni a, Olympic 2036 a lo thlen hunah Mizo infiammi tam zawk an inlan theihna tur leh, khawvel infiammi ropui leh a tha ber berte nena inelna hmachhawn thei tura inchher chhuahna tura hmalakna hmasa a ni, a ti.

Pu Lalduhoma chuan Mizote chuan infiamna chi hrang hrang an ngaina hle tih sawiin, an nunphuga bet tel tlat a ni a ti a, hlawhtlinna inlawmpui hun leh chak lohna intawrhpuina hmun a ni tih sawi bawkin, infiamna chu inunauna leh inpumkhatna siamtu pawimawh a ni tih a sawi bawk.

Sports Minister Pu Lalnginglova Hmar chuan Mizoram Sports Conclave chuan rah tha a chhuah a beisei thu sawiin, tuna naupang kum 8 atanga kum 15 velte chu Olympic 2036 a thlen hun a an vanglai hmang tur an ni a ti a, chung mite tana kawng lo sial chu hna pawimawh a ni tih sawiin, taksa leh rilru bakah hmunhma tha nei tura hmalak a pawimawh tih a sawi. Olympic awm tawhte thlirin ram lian leh rethei te pawhin infiammi tha tak tak an nei thei a ti a, chung mite ang chuan Mizote pawhin an tih awm chi leh tha an thlan thiam a pawimawh tih a sawi bawk.

Mizoram Sports Conclave-ah hian Mizoram chhunga infiammi langsar hrang hrang chawl tawh leh la infiam mekte bakah sports association hruaitu te an tel a.

Rampum huapa infiamna hruaitu lawk tak tak leh hmarchhak state atangin Assam Sports Minister Nandita Garlosa leh Meghalaya Sports Minister Shakliar Warjri te an lo kal a, Tata Sports Head of Sport Neelam Barardesai, Reliance Foundation Sports Head Siddharth Shanker, Inspire Institute of Sports Head Rushdee Warley bakah Indian Express Senior Editor Mihir Vasavda te pawh an tel a, infiamna lama hmasawna tur pawimawh hrang hrang te an sawi ho a ni.

<><><>

AH& VETY MINISTER

AH & Vety Minister Pu C. Lalsawivunga chuan Khawzawl District-a Animal Husbandry & Veterinary Office leh Hospital nimin khan a tlawh a.

Minister hian Khawzawl District AH & Vety Hospital Building sak thar te, Boar Semen Station te bakah DAH&VO Office te a tlawh a. Khawzawl District Vety Office dinhmun, hmachhawp leh mamawh hrang hrang te thawktu te nen an sawi ho. Khawtlang hruaitute nen an inkawmna-ah Pu C. Lalsawivunga chuan Khawzawlah DLAO Office a awm theih nan theihtawp chhuah a tum thu a sawi bawh a ni.

Khawzawla hun a hman zawh hian Vety Minister chuan Champhai a pan nghal a. Nimin khan Champhai a Slaughter House, District AH & Vety Office leh Hospital te a tlawh a. Vawiin hian Live Animal Slaughter House, Ruantlang, Khawbung leh Samthang te tlawhin Vaphaiah zan a riak ang.

<><><>

PIGFED

Mizoram Pig Producers' Cooperative Federation (PIGFED) Ltd. Annual General Meeting vawi 29-na chu nimin khan Cooperation Minister Pu P.C Vanlalruata hovin Aizawl Chanmari YMA Hall-ah hman a ni.

Pu P.C. Vanlalruata chuan he hunah hian fuihna thu sawiin Mizoramah Society Movement hun rei tak alo thuanawp tawh hnuah, tuaithar a nih theihna tura harsatna hrang hrang kara Society-te hmalakna kal zel hmuh theihin a awm a ni a ti a; Sawrkar pawhin Society-te pawimawhna hria in, chak zawk a an hmalaknate kalpui a nih theihna turin tanpui a tum thu a sawi a ni.

Mizo Hnam leh vawh vulh chu inzawm tlat a nih avangin vawksa leh vawh chawah intodelh a tul a ti a, vawh chaw a intodelh turin Feed Processing Unit din belh a pawimawh thu a sawi a. Thingtlang lama feed processing unit din belh chu thingtlang mite tan cost of transportation tihlem theihna pawimawh a nih thu a sawi bawh. PIGFED Ltd. chu Modern Meat Shop leh Ran chaw zawrhna Sales Outlet tam zawk hawng thei tura hmala turin a fuih bawh.

Cooperative Society hnuai farmer-te khaichhuah an nih theihna turin sawrkarin hma a lak mek thu sawiin, intodelhna tura PIGFED Ltd. in project a neihah te sawrkarin a tanpui tur thu Cooperatiion Minister hian a sawi bawh.

He hunah hian A.H & Vety. Department Addl. Director Dr. R. Malsawma chuan PIGFED Ltd. nen A.H & Vety. Department chu thawhhona tha an neih thu a sawi a, Animal Feed Plant, Tanhril hmuna Sales & Marketing hna te leh Vawh kah rai (Artificial Insemination) hna te chu PIGFED Ltd. kutah a dah mek tih a sawi a. Thawhhona tha chawinunga zel a, tan tlan zel a pawimawh thu a sawi bawh.

Pu R. Lalremsanga, Registrar, Cooperative Societies, Mizoram pawhin fuihna thutawi sawiin Primary Society te chu peipung tura din an ni tih hre reng turin a fuih a, vawk vulh chu Mizote tan sumdawna pawimawh tak, tuiawm leh Market tha sa a ni a, PIGFED Ltd. chu Mizoram economy chawikang turin a fuih a ni.

PIGFED Ltd. Annual Report tarlan danin, kum 2023-2024 chhungin Artificial Insemination Technology hmanga vawk kah rai atangin 41299 vawkte an piang a, a hlut zawng hi cheng vbc 28 nuai 90 sing 9 & 3,000 a chhut a ni. PIGFED Ltd. hnuaiah hian Affiliated Primary Society 164 lai an awm mek a ni.



#### HORTI MINISTER

Sorkar laipui Ministry of Agriculture & Farmers Welfare atangin Mizoram Horticulture Department hmalakna hrang hrang te hmuhpui turin Central Team Member te an rawn kal a, Additional Commissioner hoin Sairang Bamboo Processing Centre, leh Zo-Anthurium Growers Co-operative Society (ZAGCS) Collection Centre, Ramhlun North, Aizawl te an tlawh hnuah nimin khan Rb McCabe Hall, Aijal Club-ah Horticulture Minister Prof. Lalnilawma hovin Meeting neih a ni a. Meeting hi Pu C.H. Lalmuanpuia, Director of Horticulture-in a kaihruai.

Meeting-ah hian District hrang hrang leh Centre of Excellence (CoE), Thingdawl leh Lunglei te atangin an hmalakna thlir ho a ni a. Horticulture hnuaia Stakeholder hrang hrangte hnen atangin an hmalakna thlir ho nghal a ni.

Horticulture Minister Prof. Lalnilawma chuan Central Team-in Aizawl mai bakah Serchhip-a Zawlpui lam thlenga an kal thei chu an inpekna fakawm a tih thu a sawi a, policy maker ten an tawn hriat atangin state bil mil chi leh mamawh an zir chhuah ngei a rin thu a sawi a. Tuna Department-in Scheme a kalpui mek bakah hian hmasawn leh zual nan puih kan ngaihna lai apiangah min pui a, hmasawna tur a tanho a tul tih a sawi.

Ministry of Agriculture Additional Commissioner Dr. Naveen Kumar Patle, chuan Central-a policy duangtu an nih laiin a chhawrtute nen hun hman fo a tul thu te, heng atang hian sorkar policy thar duan a fuh ber thu a sawi a. Tuna India rama Cluster Horticulture Development hmalakna kal mekah Mizoram pawh a tel ve theih thu sawiin, Anthurium cluster, Dragon fruit cluster leh Serthlum cluster te chu hmuh a chakawm thu a sawi a, Mizoram chu dragon fruit ching zingah a rah a tui bik zia sawiin Dr. Patle chuan India ram pum huapa Dragon Fruit Conference Mizoram ah nghah ni thei se a ti a, chutiang tur chuan hmalak a rawt nghal a ni.

Central Team-te hian Centre of Excellence for Vegetable hmun tur Matkam, Serchhip District pawh tlawhin Mat Zawlpui zau-a huan siamtute nen an huan hmunah inkawmhona hun tha tak an hmangho bawka ni.

<><><>

#### LOK SABHA SPEAKER

June ni 26 ah Lok Sabha Speaker thlan a ni dawn. Lok Sabha 18-na session hmasa ber hi tun thla ni 24 tan a ni dawn a. He session ah hian Lok Sabha member thlan tharte rinawmna thu tiam tira lakluh an ni dawn a. President Draupadi Murmu chuan Lok Sabha leh Rajya Sabha Memberte thukhawm hmaah thu a sawi dawn a. A thusawi hi sawiho leh a ni bawka ang.

Hetihlai hian Rajya Sabha session hi tun thla ni 27 ah tan a ni ve thung dawn a. Parliament in hnih session hi thlaleh ni 3 thleng awh tur a ni ang.

<><><>

#### PM

Vawiin atangin Italy-ah G7 Summit tan a ni dawn. Prime Minister Narendra Modia pawhin G7 Summit-a tel turin nimin khan Apulia khua a thleng a. Sawrkar laipua Foreign Secretary Vinay Kwatra chuan G7 summit ah hian India chu sawm ve a nih thu a sawi a. Thuchhuah siamin PM Modia pawhin India-Italy thawhdunna tilian zel tur leh Indo-Pacific-a leh Mediterranean chhehvela an thawhdunna tihlen zel chu sawrkar tum a ni a ti.

Tun tum hi a term thumna atana Prime Minister anih leh hnua Prime Minister Modi-an ram pawn a tlawh hmasak ber tur a ni a. G7 Summit ah hian khawvel ramdang hruaitute nen an inkawm dawn bawka ni.

<><><>

#### NCPR

Sawrkar laipuiin Criminal law thar pathum a siam Bharatiya Nayaya Samhita 2023, Bharatiya Nagrik Suraksha Samhita 2023 leh Bharatiya Sakshya Adhiniyam 2023 te chu July ni 1 atangin hman tan a ni dawn a.

He dan tharte hrechiang duh tan mobile phone a Play Sotre leh App Store NCRB Sankalan of Criminal Laws tih download theih a ni a. He App hian criminal law thar chungchang leh a dinhmun kimchang taka en theih a ni a.

He app thar hi mipui nawlpui, Advocate, Court Officer, Law zirlai leh Police officer te tan tangkai taka hman theih tur a nih thu sawrkar thuchhuah chuan a sawi.

<><><>